

Spetgar en garascha per gea betg spaventar ils anghels

Ils giavischs na van betg adina en vigur

■ (anr/vi) Ils dus fragliuns Nesa e Dietegen Demarmels statan a Salouf. Nesa è la pitschna en famiglia. Ella sa legra fitg ch'ìls anghels vegnan oz. E Dietegen suna questa saira trumbetta. Nesa vegn mintgant era numnada «Nesigna» da sia mamma. Ella ha tschintg onns. Questa saira vegn il bambin tar ella. Perquai ch'il bambin na po betg purtat tut sulet ils blers regals, gidan ils anghelts il bambin. La famiglia da Nesa ha gia bleras giadas studegià, co ch'il bambin e ses anghels pon insumma viaden en la stiva dals Demarmels. I sto esser ch'els sa schluittan tras la rusna clav. Auter n'èsi betg pussaivel.

Il bambin è temelitz

Ma avant che tut quai succeda, tschaina Nesa cun ses frars ed ils geniturs. La tschaina da Nadal datti en stiva, na en cuschina. Da baiver datti Rimus. Suenter tschaina va Nesa cun ses dus frars e ses bab giu en garascha. «Il bambin tema uschiglio e na vegn betg.»

Cur che Nesa turna si da la garascha e va en stiva, hai sbrinzlas vi dal pignol. Sut il pignol èn ils

pac. Lezs stattan per l'emprim anc grad airi. Dietegen suna trumbetta, Mattia dat sin il schumber. E Nesa? Lezza chanta cun ils geniturs «Dorma, dorma o bambin», «Tgera steila da Nadal», «Son bambin, te rètg di-vin».

Na sa betg tge giavischar

Il grond dastga cumenzar cun l'emprim pac. Cun il grond n'è sa chapescha betg manegià il bab, mabain Dietegen. I vegn pachetà ora be in pac a la giada. Mintgin spetga fin ch'el è londervi cun pachetar ora.

Cura che Nesa avess gi da dic-tar a la mamma la brev per il bambin, n'ha ella gnanca savi tge giavischar. «Il bambin po dar tge ch'el manegia», ha ella ditg.

La fin finala ha Nesa gea fatg bunas experientschas. Ils regals ch'il bambin ha purtà l'onn passà èn stads fitg bels. Chautschas cun stailas, ina stiva da poppas, ina cuschina. Il regal che Nesa ha apprezzà il pli fitg, è stà la stgatla da curals. Cun ils curals ha ella fatg ina massa chadainas. Uss fa ella era fitg gugent puzzles. Forsa ha il bambin fastisà quai e porta in nov puzzle.

La notg da Nadal dastga Nesa ir a messa. Era sch'ella è anc pitschna dastga ella seser en il baun il pli davant. Là vesa ella bain il bel parsepen cun il bambin.

Ir per il pignol

Dietegen il frar grond ha otg onns. El ha gugent trens. Bunamain mintg'onn ha el giavischà da Nadal in tren. Ina giada ha el survegni in tren da lenn, l'onn sursura in tren che va cun batteria, lura in che va cun electric. Quest onn less el puspè in tren - in che va cun «aq». In auter giavisch da Dietegen fiss stà ina ghitarra electrica. Per quella giada na va quest giavisch probabel betg en vigur. Forsa en in u dus onns?

Sche Dietegen è giu en garascha cun ses fragliuns e ses bab, taidlan els adina chanzuns da Nadal en il radio rumantsch. «Nus faschain era ina concorrenza. Tgi che vegn d'engiavinar il pli bain, quant ditg ch'i va fin che la mamma cloma nus.»

E tge è uschiglio anc impurtant ils 24 da december? «Suentermezdi giain nus adina cun il bab per il pignol.» Nua? «En il gaud.» È quai lubi? «Quai fan tuts uschia a Salouf.»



Nesa ha tschintg onns, Dietegen otg. Els abiteschan a Salouf.